



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## "ISLAM MEMBENTUK JIWA MERDEKA"

3 September 2021 / 25 Muharam 1443

الْحَمْدُ لِلَّهِ الْقَائِلِ:

هُوَ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَى الدِّينِ كُلِّهِ وَلَوْ كَرِهَ الْمُشْرِكُونَ

(Surah At-Taubah ayat 33)<sup>2</sup>

*Maksudnya: Dia lah yang telah mengutus Rasul Nya (Muhammad) dengan membawa petunjuk dan agama yang benar (agama Islam), untuk dimenangkan dan ditinggikannya mengatasi segala agama walaupun orang-orang musyrik tidak menyukainya.*

أَشْهَدُ أَنْ لَا إِلَهَ إِلَّا اللَّهُ، وَحْدَهُ لَا شَرِيكَ لَهُ. وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ<sup>3</sup> وَعَلَى آلِهِ وَصَحْبِهِ أَجْمَعِينَ. أَمَّا بَعْدُ، فَيَا أَيُّهَا الْمُسْلِمُونَ، أُوصِيكُمْ وَإِيَّايَ بِتَقْوَى اللَّهِ؛ فَقَدْ فَازَ الْمُتَّقُونَ.

### Sidang Jumaat yang dimulihkan,

Marilah kita tingkatkan ketakwaan ke hadrat Allah SWT, dengan melaksanakan segala perintah serta meninggalkan segala larangan Nya, mudah-mudahan kita tergolong dalam kalangan insan yang sentiasa mendapat rahmat, petunjuk serta keredaan Ilahi baik di dunia begitu juga di akhirat.

Sempena sambutan kemerdekaan negara kali ke-64, mimbar pada hari ini akan menyampaikan khutbah bertajuk: "Islam Membentuk Jiwa Merdeka".

### Sidang Jumaat yang dimulihkan,

Menurut Kamus Dewan Bahasa dan Pustaka, 'merdeka' bermaksud bebas daripada penjajahan, kurungan, naungan dan sebagainya. Merdeka juga bermaksud lepas daripada tebusan atau tuntutan, serta berdiri sendiri dan tidak bergantung pada yang lain.

<sup>1</sup> Memuji Allah

<sup>2</sup> Ayat Al-Quran

<sup>3</sup> Selawat ke atas Nabi Muhammad SAW

<sup>4</sup> Pesan Taqwa



Dalam bahasa Arab, kemerdekaan disebut sebagai istiqlal (استقلال) iaitu bersendirian dalam memiliki kemuliaan, berdikari dan bangkit daripada penindasan atau melepaskan diri daripada sesuatu ikatan.

Kemerdekaan sinonim dengan kesejahteraan, kedamaian, keharmonian dan keamanan, sekali gus menuntut kita mensyukuri nikmat kemerdekaan, terutama pembebasan diri daripada keruntuhan moral serta terlindung daripada murka Allah SWT.

### **Muslimin yang dirahmati Allah,**

Pada hari Selasa 31 Ogos yang lalu, negara menyambut ulang tahun kemerdekaan kali ke-64. Kita bersyukur ke hadrat Allah SWT yang telah mengurniakan kita sebuah negara merdeka, dan warganya pula dikurniakan nikmat keamanan, kemakmuran dan kesejahteraan. Namun wajib diingatkan, nikmat menghirup udara di negara merdeka dalam suasana aman, makmur dan sejahtera bukannya ibarat bulat datang bergolek, pipih datang melayang; nikmat ini juga mungkin tidak kekal jika pemimpin tersalah pertimbangan, dan rakyat pula tersalah langkah. Nikmat keamanan, kemakmuran dan kesejahteraan ini akan hilang, jika tidak ada lagi keyakinan dan kepercayaan antara pemimpin dan rakyat.

Kemerdekaan negara dicapai melalui perjuangan, pengorbanan, semangat dan usaha. Oleh itu mempertahankan kemerdekaan juga memerlukan perjuangan, pengorbanan, semangat dan usaha. Kemerdekaan negara dicapai melalui rangkaian usaha dan gabungan tenaga antara pemimpin dan rakyat; justeru itu, mempertahankan kemerdekaan juga memerlukan rangkaian usaha dan gabungan tenaga antara pemimpin dan rakyat, dalam semangat kenegaraan yang saling berhubung dan berinteraksi, saling nasihat menasihati dan tegur menegur, saling membantu dan bekerjasama, agar ditapis yang keruh untuk mendapat yang jernih.

Kemerdekaan bukan sekadar bebasnya negara daripada pemerintahan kuasa penjajah. Kemerdekaan negara perlu dilengkapi dengan warganya memiliki jiwa merdeka. Kemerdekaan tidak memberikan sebarang erti jika ilmu pengetahuan, kepakaran, kemahiran, kekayaan dan sumber ekonomi, masih dikuasai oleh pihak lain. Kemerdekaan tidak membawa erti, jika insan masih berminda hamba, dan jiwa masih sedia mengabdikan diri kepada kuasa dan amalan yang bercanggah daripada aturan akidah dan syariat, menurut yang difirmankan oleh Allah SWT dalam ayat 56, surah Az-Zaariyat:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ



Maksudnya: Aku tidak menciptakan jin dan manusia melainkan agar mereka beribadah kepada Ku.

Islam ialah agama yang telah memerdekakan manusia daripada berminda dan berjiwa hamba; Islam mengeluarkan manusia daripada kegelapan kepada cahaya kebenaran. Islam menyeru manusia menyembah hanya Allah yang Esa. Islam menegaskan agar manusia menyerah sepenuh jiwa raga, melakukan yang makruf dan meninggalkan yang mungkar agar segala usaha mendapat keredaan Ilahi, semoga negara dan warga senantiasa dilindungi dan dirahmati Ilahi. Islam menegah manusia daripada taat dan takut kepada kuasa selain Allah SWT. Islam menegah manusia daripada melakukan perbuatan-perbuatan yang bertuhankan selain Allah SWT hingga mengakibatkan manusia menjadi syirik, tergelincir daripada akidah yang benar. Jiwa merdeka berlandaskan Islam membebaskan manusia daripada amalan dan perbuatan yang boleh merosakkan akidah dan ibadah.

### **Sidang Jumaat yang dimuliakan,**

Hidup sebagai manusia yang merdeka ialah hak asasi bagi setiap penghuni alam semesta. Islam menganjurkan manusia berjiwa merdeka, dalam fitrah, ketentuan dan pedoman penciptanya, serta berakal waras, bebas untuk berpegang keyakinan yang berlandas perintah dan larangan Allah SWT, dan pada setiap masa melakukan yang makruf dan meninggalkan yang mungkar.

Insan berjiwa merdeka memiliki jati diri, bertenaga untuk berdiri atas kaki sendiri, berupaya membina ketamadunan, serta berminda terbuka dan berjiwa besar, bersedia menilai, menapis dan menerima pakai idea dan perkara yang memberikan manfaat, di samping memiliki keberanian untuk menolak idea dan perkara yang boleh membawa kemudaratan. Insan berjiwa merdeka memiliki kekuatan dalaman yang tidak mudah diperkotak-katikkan oleh pihak musuh sama ada secara zahir (manusia) mahupun musuh yang tidak dapat dilihat (syaitan).

### **Sidang Jumaat yang dirahmati Allah,**

Dalam suasana negara baharu menyambut ulang tahun kemerdekaan kali ke-64, mimbar menyeru para jemaah agar mengambil ingatan kepada empat perkara berikut:

**Pertama:** Islam diturunkan dengan tujuan memerdekakan manusia daripada kejahilan dan kesesatan, lalu manusia dimuliakan dengan diangkat menjadi khalifah di muka bumi ini.



**Kedua:** Umat Islam wajib menterjemahkan erti kemerdekaan yang sebenar dan wajib berusaha memerdekakan diri daripada kegelapan dengan menjadikan al-Quran sebagai sumber rujukan dan Sunnah Rasulullah SAW sebagai kompas panduan.

**Ketiga:** Insan yang merdeka akan menjadi lebih sempurna ilmu, amal serta akhlaknya.

**Keempat:** Hargailah erti merdeka. Kemerdekaan negara dan kedaulatan sebuah negara merdeka perlu dilengkapi dengan warga yang berminda dan berjiwa merdeka. Asuhlah minda menjadi minda yang merdeka dan semaikan jiwa dengan roh merdeka.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ  
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ  
لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ  
فَأَسْتَغْفِرُوهُ إِنَّهُ هُوَ الْعَفُورُ الرَّحِيمُ.

### Khutbah Kedua

الْحَمْدُ لِلَّهِ حَمْدًا كَثِيرًا طَيِّبًا مُبَارَكًا فِيهِ، مِلءَ السَّمَاوَاتِ وَمِلءَ الْأَرْضِ، وَمِلءَ مَا بَيْنَهُمَا  
وَمِلءَ مَا شِئْتَ مِنْ شَيْءٍ بَعْدُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ  
سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ عَلَى سَيِّدِنَا مُحَمَّدٍ<sup>٦</sup> وَعَلَى آلِهِ وَأَصْحَابِهِ وَسَلِّمْ تَسْلِيمًا  
كَثِيرًا. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>٧</sup> وَكُونُوا مَعَ الصَّادِقِينَ.

### Kaum muslimin yang dirahmati Allah,

Mimbar menyeru para jemaah agar kita istiqamah berpegang kepada aqidah Islamiah berteraskan ahli Sunnah Waljamaah, yang menjadi warisan Rasulullah SAW, sahabat dan tabiin, hingga ke hari ini. Jagalah hubungan dengan Allah SWT dan sesama makhluk. Imarahkanlah rumah Allah SWT dengan terus-menerus mengerjakan ibadah dan solat fardu secara berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>٨</sup>

<sup>5</sup> Memuji Allah

<sup>6</sup> Selawat ke atas Nabi Muhammad SAW

<sup>7</sup> Pesan Taqwa

<sup>8</sup> Ayat Al-Quran



اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، وَأَصْلِحْ ذَاتَ بَيْنِهِمْ وَالْفِتْنَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَتَثِّبْهُمْ عَلَى مِلَّةِ رَسُولِ اللَّهِ ﷺ.

اللَّهُمَّ ادْفَعْ عَنَّا الْبَلَاءَ، وَالْوَبَاءَ، خُصُوصًا وَيْرُوسَ الْكُورُونَا، وَالْعَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بَلَدِنَا هَذَا خَاصَّةً، وَعَن سَائِرِ بُلْدَانِ عَامَّةً.

**Ya Allah**, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan *fuqara* dan *masakin* daripada kekufuran serta dihindari mereka daripada kefakiran yang berpanjangan.

**Ya Allah**, berilah kami kebaikan serta keberkatan di dunia dan di akhirat. Jauhilah kami daripada seksa dan azab api neraka.

**Ya Allah**, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَى نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلِذِكْرِ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.﴾

<sup>9</sup> Doa untuk Kaum Muslimin